

## **Namminersorlutik Oqartussat nalunaarutaat nr. 8 umimmaat illersugaanerat piniagaanerallu pillugit 27. juni 2013-imeersaq**

Pinngortitamik illersuineq pillugu Inatsisartut inatsisaanni nr. 29-imi, 18. december 2003-meersumi § 5, imm. 1, nr. 1-5-mut aamma § 60, imm. 2, Piniarneq aallaaniarnerlu pillugit Inatsisartut Inatsisaanni nr. 12-mi, 29. oktober 1999-imeersumi, § 2, imm. 4, § 7, imm. 4, § 8, imm. 1 aamma 3, §§ 12-13 aamma § 17, imm. 2, Inatsisartut inatsisaatigut nr. 1-ikkut, 16. maj 2008-meersukkut kingullermi allanngortinneqartumi naapertorlugit kiisalu Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaanni nr. 18-imi, 30. oktober 1998-imeersumi § 3, imm. 2, Inatsisartut inatsisaatigut nr. 23-kkut, 22. november 2011-imeersukkut allanngortinneqartumi, naapertorlugit aalajangersarneqarpoq:

### **Kapitali 1**

#### *Atuuffii*

§ 1. Nalunaarut manna Kalaallit Nunaanni umimmaat (*Ovibos moschatus*) illersugaanerat piniagaanerallu pillugu atuuppoq.

### **Kapitali 2**

#### *Eqqissisimatitsineq*

§ 2. Umimmaat nuna tamakkerlugu eqqissisimatitaapput, taamaattoq takukkit § 3 naapertorlugu piniarneqarsinnaaneri pillugit aalajangersakkat taaneqartut.

*Imm. 2.* Akiliuteqarluni aallaaniarneq aalisarnerlu pillugit nalunaarummi akiliisitsilluni umimmanniarnermut piumasaqaatit immikkut malittarisassaqaartitaapput.

### **Kapitali 3**

#### *Pisassiissutit, piffissat piniarfiusussat kiisalu piniarfiusussat*

#### *Pisassiissutinik aalajangersaaneq aamma agguaassineq*

§ 3. Uumassuilinnik misissuisunik siunnersuuteqareernerup kingorna Piniarnermut Naalakkersuisoq umimmannik piniarsinnaanermut pisassiissutinik aalajangersaassaaq.

*Imm. 2.* Piniarnermut Naalakkersuisoq nunap ilaanut pisassiissutinik aalajangersakkanik agguaassissaaq.

*Imm. 3.* Piniarneq pillugu Siunnersuisoqatigiit aamma Kattuffiit allat suliamut attuumassuteqartut apeqqutini imm. 1-mut 2-mullu tunngassuteqartuni tusarniarneqassapput.

*Imm. 4.* Sumiiffinni umimmannik pisassiissutinik agguaassinermi aqutsiveqarfinni pineqartuni Kattuffiit attuumassutillit tusarniarneri kommunimi oqartussat ingerlattarpaat.

*Imm. 5.* Kommunimi oqartussat Piniarnermut Naalakkersuisoqarfimmut pisassiissutinik agguaassinermi angusat inerneru pillugit imm. 4 naapertorlugu allakkatigut nalunaaruteqassapput.

### *Piffissanik piniarfiusussanik aalajangersaaneq*

§ 4. Uumassusilinnik misissuisunik siunnersuuteqareernerup kingorna Piniarnermut Naalakkersuisoq pisassiissutinik piniarnissamut aamma akiliuteqartitsilluni umimmanniarnissamut piffissamik aalajangersaassaaq.

*Imm. 2.* Imm. 1-imi piffissat piniarfiusussat taamaallaat piffissap 1. augustimip aamma 15. aprilip iluani aalajangersaaffigineqarsinnaapput.

*Imm. 3.* Piniarneq pillugu Siunnersuisoqatigiit aamma Kattuffiit allat suliamut attuumassuteqartut apeqqutini imm. 1-mi aamma 2-mi tunngassuteqartuni tusarniarneqassapput.

*Imm. 4.* Sumiiffinni ataasiakkaani umimmanut piffissanik piniarfiusussat aqutsiveqarfimmi pineqartumi Kattuffiit attuumassutillit tusarniarneri kommunimi oqartussat ingerlattaarpat.

*Imm. 5.* Kommunimi oqartussat Piniarnermut Naalakkersuisoqarfimmut piffissat piniarfiusussat inerneru pillugit imm. 4 naapertorlugu allakkatigut nalunaaruteqassapput.

### *Piniarfiusussanik aalajangersaaneq*

§ 5. Uumassusilinnik misissuisunik siunnersuuteqareernerup kingorna Piniarnermut Naalakkersuisoq sumiiffinnik piniarfiusussanik killilersukkamik umimmanniarfiusussanik aalajangersassaaq.

*Imm. 2.* Piniarneq pillugu Siunnersuisoqatigiit aamma Kattuffiit allat suliamut tunngassuteqartunut attuumassuteqartut apeqqutit imm. 1-mi pineqartuni tusarniarneqassapput.

*Imm. 3.* Sumiiffinni ataasiakkaani umimmanut sumiiffinnik piniarfiusussat aqutsiveqarfimmi pineqartumi Kattuffiit attuumassutillit tusarniarneri kommunimi oqartussat ingerlattaarpat.

*Imm. 4.* Kommunimi oqartussat Piniarnermut Naalakkersuisoqarfimmut sumiiffiit piniarfiusussat aalajangersaaneri pillugit imm. 3 naapertorlugu allakkatigut nalunaaruteqassapput.

## **Kapitali 4**

### *Pisassiissutinik piniarnermi piumasaqaatit*

§ 6. § 8 malillugu inuit akuersissutinik pisimasut aamma piniarsinnaanermut allagartamik atuuttumik pigisaqartut kisimik umimmanniaqqusaapput.

*Imm. 2.* Akuersissut inummut atiatigut taasamut taamaallaat atuuppoq allanullu tunniunneqaranilu tunineqarsinnaanani.

*Imm. 3.* Akuersissummi takuneqarsinnaavoq, sumi aamma qassinik umimmattoqarsinnaanersoq.

*Imm. 4.* Piniarnermut allagartaq 1. maj nallertinnagu akilerneqarsimassaaq, § 25-li takuuk.

§ 7. Inuussutissarsiutigalugu umimmanniarsinnaanermut akuersissummi piumasarineqarsinnaavoq umimmammik ilivitsumik ilaanilluunniit tunisinissaq uumasut nakorsaqaarfianiit

akuerineqarsimasunut neqaarniarfinnut tunitsivinnulluunniit pissasoq imaluunniit inuussutissarsiutigalugu piniartuq tunisinissamut akuersissummik atuuttumik peqassasoq.

*Imm. 2.* Kommunit ataasiakkaat sunngiffimmi aallaaniartartunut "kalaalimineerniarfimmi" tunisineq tuniniaanerlu pillugit aalajangersaassapput.

*Imm. 3.* "Kalaalimineerniarfinni" umimmannik tunisineq inuussutissalerinermut tunngasuni nalunaarummi atuuttumi piunasaqaatit malillugit ingerlanneqassaaq tuniniaanerlu taamaallaat piffissani piniarfiusuni aamma piffissap piniarfiusup qaangiunneranit amerlanerpaamik ulluni pingasuni atuuppoq.

## Kapitali 5

### *Piniakkanik killilersukkanik piniarnissamut akuersissutinik agguaassineq tunniussinerlu*

**§ 8.** Kommunit pineqartut qinnuteqartunut piniarnermut atuuttumik allagartaqartunut aamma sumiiffimmi aqutsiviusumi inuit nalunaarsorsimaffianni najugaqartutut nalunaarsorsimasunut akuersissutinik tunniussissapput.

*Imm. 2.* Imm. 1-imi aalajangersagaqaraluartoq, aqutsiviusuni allani najugaqartut sumiiffimmi aqutsiviusumi piniarnissaat Piniarnermut Naalackersuisoqarfiup akuerisinnaavaa tamanna ingerlatsiviusumi pineqartumi ammasumik pisassiisoqartillugu aatsaat pisinnaavoq.

*Imm. 3.* Akuersissutinik qinnuteqartut qinnuteqarnerminni 16-inik ukioqalereersimassapput.

**§ 9.** Akuersissutinik tunniussineq ima pisassaaq, qinnuteqartut ataasiakkaat akuersissutinik sapinngisamik amerlaqatigiinnik pissarsinissaat sumiiffiup aqutsiviusup iluani anguneqartasalluni.

*Imm. 2.* Akuersissutinik amerlanerusunik qinnuteqartoqarpat, agguaassineq makitsinikkut ingerlanneqassaaq. Akuersissutinik sinneruttunik agguaaneq aamma makitsinikkut ingerlanneqassaaq.

*Imm. 3.* Sumiiffinni aqutsiviusuni isorartuuni, piniartumut ataatsimut akuersissutit arlallit tunniunneqarsinnaapput umimmanniarneq immiut akilersinnaatinniarlugu.

*Imm. 4.* Makitsinermut atatillugu akuersissutinik agguaassisussaatitaasup utaqquisut allattorsimaffiat tullerriaarinertalik pilersissavaa, taannalu akuersissutinik agguaasseqqinnermi atuutilissaaq, takuuk § 10, imm. 2.

*Imm. 5.* Innuttaasut kikkulluunniit makitsinerup ingerlanneqarneranut malinnaasinnaatitaasapput. Akuersissutinik agguaassisussaatitaasup makitsinissaaq, akuersissutinullu tunniunneqartussanut piffissaliussap aamma sumi pinissaa, kingusinnerpaamik sapaatip akunneramik sioqutsilluni tamanut nalunaarutigissavaa.

**§ 10.** Akuersissutinik agguaassisussaatitaasup akuersissutit tunniunneqartut aaneqarnissaanut piffissaliussaq aalajangissavaa. Inuit akuersissummik tunineqarsimasut akuersissummilli atuisinnaanngitsut imaluunniit atuerusunngitsut piaarnerpaamik akuersissut atorneqanngitsoq akuersissutinik agguaassisussaatitaasumut utertissavaat.

*Imm. 2.* Akuersissutit atorneqanngitsoortut utertinneqartullu agguaateqqinneqassapput. Umimmanniarnep uninnissaa sapaatip akunnerinik sisamanik sioqqullugu, akuersissutinik

pinissamik utaqqisut tulleriaakkat allattorsimanerat malillugu agguaasseqqinneq piaarnerpaamik aatsaat pisinnaavoq.

## **Kapitali 6**

### *Piniariaatsit aamma piniarnermi ileqqorissaarneq*

**§ 11.** Umimmanniarnermi qoorortuut pisissillu atorneqaqqusaapput.

*Imm. 2.* Qoorortuut pisassiissutininik piniarnissamut atorneqarsinnaatitaasut sullukinnersaat 6,5 x 55 kaliberiuvoq (aqerlup diameteria 6,5 mm). Imassat nammineq qinerneqassapput.

*Imm. 3.* Qoorortuut eqittaannartakkat nutsuinnartakkallu umimmanniarnermi atorneqarnissaat inerteqqutaavoq.

*Imm. 4.* Aallaat sunaluunniit imm. 2 naapertorlugu piniarnermut atorneqaqqusaasoq nakersarneqarsimassaaq pitsaasuussallunilu.

*Imm. 5.* Pisisseq atorlugu umimmanniarneq inunnit Kalaallit Nunaanni, Danmarkimi imaluunniit nunani allani pisissimik piniarnermut misilitsinnermi takussutissartalimmik angusaqarsimasunit ingerlanneqarsinnaavoq.

*Imm. 6.* Pisisseq atorlugu umimmanniarnermi piumasagaatit ukuupput:

1) Pisisseq Compound-iussaaq (katitigaq / nutaaliaasoq), pisisseq aaqqinneqarsinnaasumik umerfeqassaaq / nalunaaqutaqassaaq minnerpaamillu 60 pund-inik (28 kg.-inik) nusutsinnaassuseqarluni.

2) Qarsui minnerpaamik 525 grains-inik (34 gr.-inik) oqimaassuseqassapput.

3) Qarsut naqqi mekanisk-iusut atorneqaqqusaanngillat.

**§ 12.** Umimmaap pisarineqartup neqaa tamaat pisaqarfimmiit nassarneqassaaq. Pisap sinneri sapinngisamik pisaqarfiup qimalernerani nassarneqassapput imaluunniit tupeqarfiit, illuaqqat akiliuteqarluniluunniit aallaaniarnerup ingerlanneqarneranut akornusiinatik inissineqassallutik.

## **Kapitali 7**

### *Akiliuteqarluni aallaaniarnermi immikkut piumasagaatit*

**§ 13.** Piniarnermut Naalackersuisoq pisassiissutininik piniarnissap aamma akiliuteqarluni aallaaniarnissap akornanni pisassiissutininik agguaassinissamut aalajangersaassaaq.

*Imm. 2.* Akiliuteqarluni aallaaniarnissamut pisassiissutigineqartut, umimmanniarnissamut pisassiissutinit tamarmiusunit tiguneqassapput, takuuk § 3, imm. 1.

*Imm. 3.* Naak § 4, imm. 2-mi aalajangersagaqaraluartoq, Piniarnermut Naalackersuisoq akiliuteqarluni aallaaniarnermut ukioq kaajallallugu tigganniarnissamut piffissamik piniarfiususamik aalajangersaasinnaavoq.

*Imm. 4.* Arnavissamik piaqqamillu akiliuteqarluni aallaaniarneq piffissami 1. marts-miit - 31. julimut inerteqqutaavoq.

*Imm. 5.* Akiliuteqarluni aallaaniarnermi qoorortuut sullukinnersaat 7,62 x 63 kaliberiuvoq (aqerlup diameteria 7,62 mm) soorlu 30-06 aamma 308. Imassat nammineq qinerneqassapput.

*Imm. 6.* Pisisseq atorlugu akiliuteqarluni umimmanniarneq inunnit Kalaallit Nunaanni, Danmarkimi imaluunniit nunani allani pisissimik piniarnermut misilitsinnermi takussutissartalimmik angusaqarsimasunit ingerlanneqarsinnaavoq.

*Imm. 7.* Pisisseq atorlugu umimmanniarnermi piumasaaqatit ukuupput:

1) Pisisseq Compound-iussaaq (katitigaq / nutaaliaasoq), pisisseq aaqqinneqarsinnaasumik umerfeqassaaq / nalunaaqutaqassaaq minnerpaamillu 60 pund-inik (28 kg.-inik) nusutsisinnaassuseqarluni.

2) Qarsui minnerpaamik 525 grains-inik (34 gr.-inik) oqimaassuseqassapput.

3) Qarsut naqqui mekanisk-iusut atorneqaqqusaanngillat.

*Imm. 8.* § 20-imi aalajangersagaqaraluartoq akiliuteqarluni aallaaniarnermi umimmattat *PINIARNEQ*-mut nalunaarutigineqassapput. Akiliuteqarluni piniartitsinnermik aaqqissuisut Piniarnermut Naalackersuisoqarfimmut nalunaarusiortassapput. Tamatuma kingornatigut paasissutissat katersorlugit *PINIARNEQ*-mut nassiunneqassapput.

## **Kapitali 8**

### *Umimmanniarnermut atatillugu assartuutitik atuineq*

§ 14. Umimmannik malersuinnermi ungasinnermilu assartuutit atorneqaqqusaanngillat, § 15-ili takuuk.

*Imm. 2.* Assartuutit taamaallaat piniarfimmut piniarfimmiillu assartuinnermut atorneqaqqusaapput nunamilu assartuutitik ingerlaarnermut atatillugu umimmannut uumasunut minnerpaamik 500 meterinik ungasissusissaaq malinneqassaaq.

*Imm. 3.* Umimmanniarnermi qimmit nassatareqqusaanngillat, imm. 4-5-imili pineqartut pineqanngillat.

*Imm. 4.* Allorniusami kangimukartup 44° W-mi avannamukartullu 66° N-mi qimmeqarfinni qimussit assartuutit atorneqaqqusaapput.

*Imm. 5.* Sumiiffimmi piniarfiusumi qimmit qimuttut qimaannaqqusaanngillat. Qimmit qima-taasut tiguneqarsinnaanngitsullu sapinngisamik ajornanngippat aallaaneqassapput. Qimmip toqungasup timaa sumiiffimmi piniarfiusumi qimaannarneqaqqussanngilaq. Kingusinnerpaamik piniarnerup naammassinerata kingornatigut qimmit qimmeersiutaasut politiinut nalunaarutigineqassapput.

## **Kapitali 9**

### *Umimmannik ungasineq*

§ 15. Piniarnermut Naalackersuisoqarfik § 14, imm. 1-imik immikkut makkuninnga tunn-gaveqartunik akuersissuteqarsinnaavoq:

1) Allakkatigut qinnuteqaammik tigusaqarsimaneq.

2) Qinnuteqaat peqataasussat allattorsimaffiannik, kiisalu piffissaaq aamma ungasinissap sumiiffissaa pillugu paasissutissanik imaqaasaaq.

3) Ungasineq qamuteralaat, ATV imaluunniit qulimiguulik atorlugit ingerlanneqassaaq.

*Imm. 2.* Immikkut akuersissummi piumasaqaatinik nalunaarummik Piniarnermut Naalakkersuisoqarfiup peqataasullu akornanni allatamik isumaqatigiissusiortoqassaaq.

*Imm. 3.* Umimmannik unguisinnanermut immikkut akuersissut taamaallaat inunnut inuus-sutissarsiutigalugu piniarsinnaanermut allagartalinntunniunneqarsinnaassaaq.

## **Kapitali 10**

### *Umimmammik pissatamik toqutsineq*

§ 16. Piniartuq pisussaavoq umimmaap eqqorneqarnermi kinguninguagut toqusimanera qularnaassallugu.

*Imm. 2.* Piniarnermi umimmammik pissaasoq, pisussaavoq umimmak pissatani sapinngisamik piaarnerpaamik toqussallugu.

*Imm. 3.* Umimmak pissataq nanineqanngippat toqunneqaranilu, piniartup piniarnerup naam-massineqarneranut atatillugu pissutsit piviusut pillugit Piniarnermut Naalakkersuisoqarfik imaluunniit piniarnermut aallaaniarnermullu nakkutilliisooq ilisimatissavaa.

*Imm. 4.* Umimmammik pissatamik sulilu uumasumik takunnittup sapinngisamik ajornanngippat umimmak toqussavaa. Pinarinnineq piffissap piniarfiusup avataani pippat, umimmak summiffianut qimanneqassaaq. Pinarinnittup pisussaaffittut akisussaaffigaa, pisup qanoq ingerlasimanera Piniarnermut Naalakkersuisoqarfimmut imaluunniit piniarnermut aallaaniarnermullu nakkutilliisumut nalunaarutigissavaa.

*Imm. 5.* Umimmak toqungasoq takusaq takunniffimmut qimaannarneqassaaq.

## **Kapitali 11**

### *Uumatillugit tiguserit nuussinerillu*

§ 17. Piniarnermut Naalakkersuisooq akuersiteqqaarsimatinnagu umimmannik tiguserineq imaluunniit nuussineq kiisalu soriarsinnaajunaarlugit ungalusat iluiniititsinissaq inerteqqaapput.

## **Kapitali 12**

### *Kommunimi ileqqoreqqusaq*

§ 18. Kommunimi ileqqoreqqusakkut kommunalbestyrelsi nalunaarut manna naapertorlugu, nalunaarummi maani aalajangersakkanik § 3, imm. 2-3-mit, § 4, imm. 2-3-mit aamma § 14, imm. 1-2-mit, sakkortunerusunik piumasaqaateqarsinnaavoq.

*Imm. 2.* Kommunimi ileqqoreqqusaq, Piniarnermut Naalakkersuisumit atulersinneqassaaq.

## **Kapitali 13**

### *Najukkami aqutsineq*

§ 19. Piniarnek pillugu Siunnersuisoqatigiinnik aamma kattuffinnik allanik attuumassuteqartunik tusarniaarenikkut Piniarnermut Naalakkersuisup, nunap immikkoortuinik killilikkanik ilivitsunik taakkuluunniit ilaanik aqutsinissamut agguaassisinnaavoq.

*Imm. 2.* Taakkununga piunasaqaatit allaganngorlugit Piniarnermut Naalakkersuisup imaluunniit Naalakkersuisumit tamatumunnga toqqarneqarsimasumit aamma akuersissutinik aguaassisussaataitaasunit atuuttunit isumaqatigissutigineqassapput.

#### **Kapitali 14**

##### *Pinngortitami uumassusilinnik misissuinermit nalunaaruteqartarnek*

§ 20. Pisanik nalunaaruteqarnek imaluunniit pisanut nalunaarsuutininik kommunimut tunnius-sineq piniarnerup naammassineqarnerata kingornatigut kingusinnerpaamik sapaatip akunnerisa marluk qaangiunneranni pissaaq. Tamatuma kingornatigut paasissutissat ataatsimoortillugit piniarnerup naammassinerata kingornatigut kingusinnerpaamik sapaatip akunnerisa sisamat qaangiunneranni kommunimit Pinngortitaleriffimmut nassiunneqassapput.

*Imm. 2.* Pisanik nalunaaruteqarnermi immersuiffissiaq akuersissutip tunuaniittoq kingusinnerpaamik, pisap angallammut piniarnermut atatillugu assartuutaasumut ikineqarnerani immersorneqassaaq.

#### **Kapitali 15**

##### *Nujuartanik pisanik nalunaarutiginninneq*

§ 21. Umimmannik pisat aamma pissatat tamarmik, naak § 20-imi aalajangersagaqaraluartoq, *PINIARNEQ-mi* ukiumoortumik immersuiffissiami nalunaarutigineqassapput.

#### **Kapitali 16**

##### *Nakkutilliineq*

§ 22. Kinaluunniit politiinit imaluunniit piniarnermik aallaaniarnermillu nakkutilliisunit umimmanniarsinnaatitaanini uppersarsaqqullugu piunaffigineqaruni, akuersissut atuuttoq aamma piniarnermut allagartaq atuuttoq takutissavai.

#### **Kapitali 17**

##### *Immikkut akuersissuteqartarnek*

§ 23. Siunertanut ilisimatusarnermik ilinniartitaanermillu siunertaqartunut nalunaarummi aalajangersakkat Piniarnermut Naalakkersuisoqarfimmit immikkut akuersissuteqarfigineqarsinnaapput, tassunga ilaalluni ilisimatusarnermut atatillugu umimmanniarsinnaanermut akuersineq.

§ 24. Umimmaat ulorianartorsiortitsisut imaluunniit angallannermit atatillugu annertuumik akornusersuisut qimaatinneqarsinnaanngippata toqunneqarsinnaapput.

*Imm. 2.* Umimmaat imm. 1 naapertorlugi toqunneqartut Namminersorlutik Oqartussanut pigisassanngortinneqassapput. Piniarnermut Naalakkersuisoqarfimmut piniarnerup ingerla-

simanera nalunaarutigissallugu umimmannik pisaqarnermi akisussaasup pisussaaffigaa. Naalakkersuisoqarfiup umimmaap toqutap qanoq pineqarnissaa aalajangiiffigissavaa.

§ 25. § 6 imm. 4-mi aalajangersagaqaraluartoq aqutsinermi periaatsit aallaavigalugit piniarnermut allagartap 1. maj nallertinnagu akilerneqarsimanissaanik piumasaqaammit immikkut akuersissuteqartoqarsinnaavoq.

### **Kapitali 18**

#### *Pineqaatissiissutit*

§ 26. Nalunaarummi matumani aalajangersakkanik unioqqutitsinermi akiliisitsineq pineqaatissiissutaasinnaavoq kiisalu sunngiffimmi aallaaniarsinnaanermut allagartaqarsinnaaneq imaluunniit inuussutissarsiutigalugu piniarnermut allagartaqarsinnaaneq arsaarinnissutaasinnaapput.

*Imm. 2.* Nalunaarummi malittarisassanik unioqqutitsinermi umimmannit pisarineqartunit isertitat Kalaallit Nunaanni pinerluttulerinermi inatsisini malittarisassatigut aalajangersakkat naapertorlugit arsaarinnissutigineqarsinnaapput.

*Imm. 3.* § 18 naapertorlugu, kommunimi ileqqoreqqusaliani kommunalbestyrelsi aalajangersaasinnaavoq, ileqqoreqqusaliani aalajangersakkanik unioqqutitsinerit Kalaallit Nunaanni pinerluttulerinermi inatsisini malittarisassatigut aalajangersakkat naapertorlugit akiliisitsinermik arsaarinnissummillu kinguneqassasut.

### **Kapitali 19**

#### *Atuutilerfia il.il.*

§ 27. Nalunaarut manna atuutilerpoq ulloq 27 juni 2013.

*Imm. 2.* Peqatigitillugu Namminersorlutik Oqartussat umimmaat illersugaanerat piniagaanerallu pillugit nalunaarutaat nr. 9, 11. juli 2012-imeersoq atorunnaarsinneqarpoq.

*Kalaallit Nunaanni Namminersorlutik Oqartussat, ulloq 27. juni 2013*



Karl Lyberth



Jens K. Lyberth